



PROVEDOR DE DIREITOS HUMANOS E JUSTIÇA

**RELATÓRIU MONITORIZASAUN ESTADU EMERJÉNSIA
28 MARSU – 26 ABRIL 2020**

KONTEÚDU

KONTEÚDU	2
LISTA AKRONIMU	3
PARTE I - KNAAR PROVEDOR DE DIREITOS HUMANOS E JUSTIÇA NO ATIVIDADE MONITORIZASAUN PDHJ NIAN	4
<i>Investigasaun alegasaun violasaun direitu umanu ka boa governasaun</i>	4
<i>Monitorizasaun no Fiskalizasaun</i>	5
PARTE II - PREVENSAUN NO KOMBATE BA COVID-19	6
1. <i>Prevensaun hada'et COVID-19</i>	6
2. <i>Identifikasaun no Tramentu COVID-19</i>	10
3. <i>Garantia ba Ema nia Privacidade</i>	11
4. <i>Diskriminasaun no Stigma hasoru suspeitu no pasiente COVID-19</i>	12
5. <i>Asesu ba Informasaun</i>	13
PARTE III – ASUNTU SELUK RELEVANTE BA DIREITU NO GARANTIA EMA NIAN NO IMPAKTU NEGATIVU HOSI ESTRATÉJIA PREVENSAUN NO KOMBATE BA COVID-19	
1. <i>Direitu ba Ai-Han, Moris Adekuaudu no Direitu Traballu</i>	14
2. <i>Asesu ba Edukasaun</i>	15
3. <i>Direitu ba Asisténsia Médiku iha ámbitu jerál</i>	15
4. <i>Moris la hó violénsia, inklui violénsia doméstika</i>	16
5. <i>Atendimentu públiku</i>	18

LISTA AKRONIMU

BNCTL	Banco Nacional de Comércio de Timor-Leste
COVID-19	Corona Virus 2019
F-FDTL	FALINTIL-Forsas da Defesa de Timor-Leste
MSSI	Ministerio Solidariedade Sosial no Inkluzaun
ONU	Organizasuan Nasoens Unidas
OPS	Ofisiál Polísia Suku
PDHJ	Provedor de Direitos Humanos e Justiça
PIDSP	Paktu Internasionál kona-ba Direitu Sivíl no Polítiku
PNTL	Polisia Nasional Timor-Leste
RAEOA	Rejiaun Administrativa Espesial Oecusse-Ambeno
UPF	<i>Unidade de Patrulhamento de Fronteiras</i>
VPU	Unidade Ema Vulnerável

PARTE I - KNAAR PROVEDOR DE DIREITOS HUMANOS E JUSTIÇA NO ATIVIDADE MONITORIZASAUN PDHJ NIAN

Provedor de Direitos Humanos e Justiça (PDHJ) nu'udar órgaun independente ida ne'ebé iha funsaun atu apresia no buka dalan atu atende sidadaun sira-nia kesar hasoru poder públiku, bele hare atu ida-idak la'o tuir lei ka lae, prevene injustisa no hala'o prosesu atu hadi'a injustisa. Órgaun ne'e iha kompeténsia ba defeza no promove direitos umanus, liberdade no garantia fundamental sira-ne'ebé hatur iha artigu 27 hosi Konstituisaun Repúblika Demokrátika Timor-Leste no Tratadu Internasional Direitos Umanus ne'ebé mak Timor-Leste ratifika tiha-ona.

Espesifikamente regula iha artigu 7 no 19 husi Lei Nú. 3/2008, 22 Feveiru ne'ebé estabelese Regime Estadu Sitiun no Estadu Emerjénsia, no artigu 7 no 8 hosi Lei No. 1/2020, 27 Marsu, kona-ba Autorizasaun Deklarasaun Estadu Emerjénsia, rekoñese knaar no kompeténsia PDHJ nian hodi defende sidadaun sira nian direitu, liberdade no garantia fundamental sira hodi prevene katak sidadaun sira la hetan ameasa ka violasaun ruma.

Estatutu PDHJ hatuur iha Lei Nú. 7/2004, 05 Maiu, artigu 24, ne'ebé altera ho Lei Nú. 8/2009, fô kompeténsia ba PDHJ hodi halo fiskalizasaun no rekomendasaun. PDHJ iha kompeténsia hodi superviziona funsionamentu poder públiku sira-nia lalaok, nomeadamente Governu no órgaun públiku relevante, entidade privada-sira ne'ebé mak hala'o funsaun no serbisu públiku.

Bainhira simu keixa husi públiku maka PDHJ bele hahú inkéritu kona-ba violasaun sistemátika ka generalizada, relativamente ba asuntu direitos umanus no mal administrasaun. PDHJ mos iha kompeténsia atu fornese pareser, rekomendasaun, proposta no relatóriu-sira kona-ba material saida de'it relativu ho promosaun no protesasaun direitos umanus no governasaun diak hodi submete ba Governu, Parlamentu Nasionál ka órgaun competente seluk. Instituisaun ne'e mós iha kompeténsia halo fiskalizasaun no verifika kompatibilidade kualkér Lei, regulamentu, despaxu administrativu, polítika no prátika sira-ne'ebé ein vigór ka kualkér proposta legislativu no haktuir ba tratadu internasional sira ne'ebé mak Estadu Timor-Leste ratifika tiha ona.

Atu implementa kompeténsia sira-ne'e, lei determina asesu ba pesoál sira PDHJ nian ba fatin, ekipamentu, dokumentu, sasán ka informasaun ruma no halo inspesaun ka interrogasaun ba ema ne'ebé d'eit ho relasaun ho kesar ida (artigu 25 Estatutu PDHJ). Iha tempu hanesan, lei impoin devér kooperasaun ho PDHJ husi kualkér ema ida, inklui funsionáriu públiku, ajente administrasaun no titulár sira husi kualkér árgaun sivíl ka militar. Devér kooperasaun inklui devér kolabora no fornese informasaun hirak ne'ebé mak PDHJ solisita bainhira ezerse ninia-funsaun.

Haree ba knaar servisu PDHJ durante Estadu Emerjénsia, maka atividade sira foka liu bá simu kesar, halo fiskalizasaun no hato'o rekomendasaun relevante.

Investigasaun alegasaun violasaun direitos umanus ka boa governasaun

Durante Estadu Emerjénsia, PDHJ simu kesar sanulu (10) husi sidadaun-sira. Kesar 8 relaciona ho atuasaun husi ajente seguransa ne'ebé uza forsa esesivu, hanesan la proporsional tuir nesiedade hanesan hatuur ona iha Dekretu-Lei Nú. 43/2011, hosi 21 Setembru kona-ba Rejime Jurídiku Uza Força no kesar rua seluk relaciona ho interpretasaun no implementasaun regras administrativus Estadu Emerjénsia nian.

Monitorizasaun no Fiskalizasaun

Atividade Provedoria inklui:

1. Monitorizasaun no fiskalizasaun ba entidade pública sira iha Munisípiu Díli, Baucau, Bobonaro, Manufahi, Lautem, Covalima no RAEOA. Ekipa PDHJ halo observasaun mós ba portu, aeroportu, no fronteira terrestre sira, fatin serbisu administrasaun pública sira, inklui eskola, universidade, sentru formasaun no treinamentu vokasionál no fatin seluk ne'ebé relevante ba kompeténsia PDHJ. Aleinde-ne'e, Provedoria mós halo monitorizasaun ba *vias públicas* no estabesimentu komersiál, inklui farmásia, merkadu, supermerkadu, loja sira no seluk tan. Monitorizasaun hala'o ho respeito ba regra sira distansiamentu físiku haree ba rekoñesimentu ba risku saúde nian comunidade no funsióriu Provedoria.
2. Monitorizasaun durante Estadu Emerjénsia foka ba implementasaun Medida Ezekusaun hosi Deklarasaun Estadu Emerjénsia ne'ebé hatuur iha Dekretu Governu Nú. 3/2020, hosi 28 Marsu. Aleinde ne'e, Provedoria monitoriza mós impaktu sósiu-ekonómiku ba populaasaun, inklui asesu ba saúde, direitu ba ai-han, edukasaun, bé mo'os no saneamentu, no kestaun direitus umanus sira seluk relevante. Monitorizasaun mós fo atensaun espesial ba atuaasaun hosi agente seguransa sira, asesu ba informasaun kona-ba atualizasaun moras COVID-19, inklui serbisu sira ba prevensaun tratamentu no izolamentu ba ema ne'ebé infetadu husi moras COVID-19.

Atu fasilita Provedoria nia knaar sira, PDHJ aprova Planu Operasional iha loron-22 fulan-Abril tinan-2020 ne'ebé komplementa Planu Kontinjénsia Provedoria nian ne'ebé aprova molok deklarasaun Estadu Emerjénsia. Instrumentu internál ida-ne'e hodi haforsa instituisaun nia ezekeusaun no mandatu konstitusionál durante Estadu Emerjénsia. Planu Operasional ne'e fó dalan ba pesoál Provedoria nian hodi halo monitorizasaun iha Munisípiu 12 no RAEOA bainhira nesesáriu.

PARTE II - PREVENSAUN NO KOMBATE BA COVID-19

Estadu Emerjénsia sai hanesan opsaun ne'ebé Estadu uza atu bele foti asaun nesesáriu atu kontrolu hada'et COVID-19 no mós atu garante katak Timor-Leste sei iha tempu atu hametin kapasidade no halibur ekipamentu nato'on atu bele hala'o tratamentu ba paciente sira ne'ebé hetan moras refere.¹

Estadu Emerjénsia hanesan estadu esesaun nian ne'ebé fó-dalan ba suspensaun no limitasaun direitu umanu ema nian.² Haree ba realidade COVID-19, Estadu Emerjénsia ne'ebé dekreta iha loron-27 fulan-Marsu determina suspensaun no limitasaun direitu no liberdade balun durante loron 30.

1. Prevenσαun hada'et COVID-19

Medida prinsipál sira atu prevene hada'et COVID-19 mak determinasaun restrisaun ba liberdade movimentu hosi populasau. Liberdade movimentu bazeia ba nível tolu: liberdade atu ba-mai iha rai laran, liberdade atu sai hosi rai ida no liberdade atu tama iha ema-nia rai rasik³.

Atu hola medida hodi prevene hada'et COVID-19, Governu, tuir ninia kbi'it iha deklarasaun Estadu Emerjénsia, determina limitasaun ba movimentu oinoin, inklui konfinamentu obrigatóriu ba sira-ne'ebé tama iha teritóriu nasional⁴, suspensaun ba garantia retornu mai iha Timor-Leste hosi nasional sira⁵, determinasaun ba limitasaun ba movimentu iha dalan, inklui distansiamentu sosal⁶, no mós restrisaun ba uzu transporte koletivu⁷.

Direitu atu fila mai Timor-Leste hanesan direitu ida ne'ebé fundamentál no bele de'it hetan limite bainhira nesesáriu. Durante prazu Estadu Emerjénsia hahú determina limitasaun balun ba direitu movimentu, hanesan konfinamentu obrigatóriu ba ema hotuhotu – estranjeiru ka nasional – ne'ebé tama iha teritóriu nasional⁸.

a. Konfinamentu Obrigatoriu

Bainhira Timor-Leste konfirma kazu pozitivu dahuluk nian ba COVID-19 (iha loron-21 fulan-Marsu), Governu hahú ho lalais implementa medida konfinamentu iha kuarantena ba sira-ne'ebé tama mai teritóriu Timor-Leste hosi nasaun afetadu COVID-19. Konfinamentu obrigatóriu determina nu'udar medida prinsipál ida hosi Estadu Emerjénsia hahú iha loron-27 fulan-Marsu. Governu uza facilidade hanesan otél iha Dili laran ho número kuaze 16.

Haree ba dadus ne'ebé fó-sai hosi Governu iha loron-26 fulan-Abril, liu ema na'in 2,000 sei hela ka pasa ona hosi kuarantena ne'ebé Governu tau matan ba. Ezijénsia ba akomodasaun,

¹ Haree Preámbulu, Dekretu Governu nú.3/2020, hosi 28 Marsu [kona-ba Medidas de execução da declaração do estado de emergência efetuada pelo Decreto do Presidente da República n. 29/2020 de 27 de Março]

² Artigu 25 Konstituisaun RDTL.

³ Kapitulu II no III, Dekretu Governu nú.3/2020, hosi 28 Marsu.

⁴ Artigu 13, Dekretu Governu nú.3/2020, hosi 28 Marsu

⁵ Konsellu Ministru iha 8 Avril 2020 halo revizaun ba Dekretu Governu nú.3/2020, hosi 28 Marsu

⁶ Artigu 16, Dekretu Governu nú.3/2020, hosi 28 Marsu

⁷ Artigu 21, Dekretu Governu nú.3/2020, hosi 28 Marsu

⁸ Artigu 13, Dekretu Governu nú.3/2020, hosi 28 Marsu.

monitorizasaun saúde no garantia ba kondisaun báziku sai nu'udar dezafiu boot atu bele organiza ho lalais.

PDHJ rekoñese katak iha dezafiu oi-oin atu garante izolamentu fíziku hosi ema sira iha kuarantena, haree ba limitasaun kuartu atu garante akomodasaun individuál no dezafiu lojístika atu garante ai-han ho kualidade no kuantidade ne'ebé nesesáriu. PDHJ apresia ho rekoñesimentu hosi autoridade públika rasik no mós kompromisu atu hadi'ak kondisaun iha kuarantena no mós atu promove instalasaun kuarantena iha área fronteira atu akomoda ema sira hotu ne'ebé presiza no promove sistema ida ne'ebé efetivu liu atu jere monitorizasaun no atendimentu saúde. Entidade públika sira iha devér atu garante asesu ba facilidade saúde sira bainhira sidadaun sira iha kondisaun moras ne'ebé eziije atensaun espesífiku hosi autoridade sira.

PDHJ rekomenda atu kontinua halo esforsu hodi hadi'ak facilidade kuarentena atu garante tratamentu dignu no kondisaun di'ak no promove elaborasaun hosi autoridade saúde orientasaun klaru kona-ba disponibilidade ai-moruk, tratamentu no ai-hán ne'ebé bele garante sidadaun nia saúde durante tempu iha kuarentena.

PDHJ mós observa difikuldade inisiál ne'ebé Governu hasoru atu garante seguransa hosi facilidade kuarantena bazeia ba asesu informasaun limitadu hosi comunidade kona-ba moras COVID-19 no preokupasaun katak moras sei hada'et ba comunidade bainhira kuarantena ida sei hamriik iha área lokál comunidade nian. PDHJ observa katak, liuhosi prosesu diálogu, Governu hatudu duni kapasidade atu kontrola situasaun no promove entendimentu ho comunidade. Diálogu hanesan mekanizmu ne'ebé integra perspetiva direitus umanus no boa governasaun no garante transparénsia no partisipasaun hosi comunidade.

Iha tempu hanesan PDHJ apresia katak autoridade públika, mezmú ho dezafiu oi-oin, garante nafatin informasaun fó-sai ba públiku kona-ba lokalizasaun hosi kuarentena sira hotu. Fó-sai informasaun kona-ba fatin kuarentena atu permite monitorizasaun ba ninia kondisaun, no mós atu promove transparénsia ba kondisaun ema privadu sira bainhira sira iha sira-nia liberdade movimentasaun limitadu.

Hahú hosi loron-13 fulan-Abril, bazeia ba desizaun Governu nian tuir ninia podér iha tempu Estado Emerjénsia, fronteira sira taka no foti desizaun atu suspende sidadaun nasional sira-nia direitu atubele mai fali Timor-Leste.

PDHJ rekomenda ba Governu futuramente/kuandu posivel atu determina estratéjia ida espesífiku atu hapara suspensaun direitu sidadaun sira fila mai Timor-Leste, liuhusi mekanizmu ida ne'ebé bele garante kapasidade nato'on atu kontrola importasaun moras COVID-19 iha Timor-Leste.

- b. Servisu Forsa Seguransa no administrasaun pública iha prevensaun no combate Covid-19

Apezárde difikuldade inisiál atu kompreende regra Estado Emerjénsia ninia ámbitu, PDHJ rekoñese PNTL nia esforsu ne'ebé rezulta katak, ein jerál, hala'o ninia funsaun ho di'ak, liu-liu asegura implementasaun medida sira atu prevene COVID-19 hanesan distansiamentu sosiál no bandu halibur ema ho númeru a'as liu duké ema na'in-lima.

Iha Munisipiu Manufahi, PDHJ observa katak PNTL hatudu kapasidade atu serbisu hamutuk ho entidades públicas sira seluk hanesan F-FDTL, *Bombeiros*, protesau sivil, Servisu Saúde, no Autoridade Munisipál hodi implementa regra hanesan distansiamentu fíziku no regra seluk

relasiona ho ijiene iha loja no facilidade públiku, no kontrolu atu garante respeito regra bandu atividade halibur malu, hanesan halo jogu, liuliu iha merkadu Manufahi.

Iha Munisípiu Dili, Lautém no iha RAEOA, PNTL continua halo kontrolu atu asegura katak sidadaun hot-hotu uza máskara bainhira sai ba iha fatin públiku no mós promove katak *kios*, merkadu no fatin públiku seluk fornese bé no sabaun atu ema hotu bele fase liman bebeik. PDHJ mós rekoñese esforsu *Unidade de Patrulhamento de Fronteiras* (UPF) iha munisípiu Bobonaro continua garante seguransa iha área fronteira atu asegura katak sidadaun Timor-Leste ne'ebé tama iha território nasionál sei tuir konfinamentu obrigatóriu.

Iha tempu hanesan PDHJ mós identifika limitasaun husi membru seguransa balun hanesan Ofisiál Polísia Suku (OPS) ne'ebé viola rasik regra distánsiamentu sosiál tanba hola parte iha atividade rituál iha Baucau.

PDHJ nota ho preokupasaun katak durante tempu estadu emerjênsia atu foti medida hodi kontrola sidadaun sira ne'ebé mai husi rai liur, líder instituisaun publika no seguransa no representante husi orgaun soberano balun utiliza média atu fó-sai deklarasaun ne'ebé promove uzu forsa esesivu ba forsa ho serbisu seguransa sira. Deklarasaun fó-sai ho afirmasaun katak ema ne'ebé viola regra kuarentena no regra seluk implementasaun Estadu Emerjênsia tenke hetan agresaun fizika atu bele aprende. PDHJ apresia ho deklarasaun Governu, liuhosi portavós iha *Centro Integrado de Gestão das Crises* no deklarasaun husi Ministro Interior Interino, deklara katak forsa seguransa tenke atua tuir legalidade.

PDHJ rekomenda atu garante katak sei la iha autoridade públika ne'ebé sei konsidera uzu violênsia esesivu nu'udar medida atu promove kumprimentu regra ida, ho ezaltasaun ka promosaun ba asaun ne'ebé viola legalidade demokrátika ne'ebé hatu'ur bazeia ba garantia fundamentál sira.

Bainhira fó ba forsa no serbisu seguransa sira knaar atu kontrola ema nia movimentu hanesan poder ida-ne'ebé luan, no sempre tenke garante respeito rigorozu ba limite hosi regra sira relevante, no monitora ninia implementasaun. Iha Estadu Emerjênsia, forsa no serbisu seguransa tenke garante liña komunikaun ne'ebé efetivu ba sira-nia membru no tenke nafatin promove responsabilizasaun ba violasaun regra no ema-nia direitu husi membru sira. Durante Estadu Emerjênsia iha kualkér Nasaun ida, Estadu Direitu sei sempre hasoru risku balun, no kapasidade autoridade públika atu mantein kumprimentu regra husi ninia membru hanesan esensiál atu hado'ok risku ida-ne'e. PDHJ apresia Chefe do Governo nomos Ministro do Interior em exercício ne'ebé ho prontidão trata keixa sira ne'ebé haruka husi PDHJ relasionadu ho alegasaun violasaun direitos umani ne'ebé halo husi fiskalizadores regras Estadu Emerjênsia sira. **Ho nune'e, PDHJ rekomenda atu PNTL continua promove medidas necessárias sira hodi garante katak oficiais policias sira halao funsaun tuir deit regras Estadu Emerjênsia nian.**

Durante tempu combate COVID-19, sei sai teste boot ida mós ba PNTL nia kapasidade atu implementa polisiamentu komunitáriu no polisiamentu ne'ebé besik ba populasaun bazeia ba prinsipiu sira VIP (visibilidade, envolvimentu no profesionalizmu). Knaar PNTL inklui aspetu edukativu ba medida sira prevensaun COVID-19 no kapasidade membru PNTL atu rezolve potenciál konflitu liuhosi diálogo ida konstrutivu ne'ebé sei la lori nesesidade atu uza forsa fíziku. Uza diálogo ho meu komunikaun efetivu representa mós estratéjia ida atu hamenus risku ba membru PNTL nia saúde rasik.

PDHJ rekoñese esforsu husi PNTL no rekomenda ba Komandu Jerál PNTL atu continua promove koñesimentu PNTL ba nesesidade hodi mantein no hametin aplikasaun

prinsípiu polisiamentu komunitáriu liuhusi kria komunikasaun di'ak ho comunidade no atensaun espesial ba membru comunidade sira-ne'ebé vulnerável liu.

PDHJ mos rekomenda ba Ministério Defesa no Interior atu uza orsamentu ne'ebé disponível iha Fundu COVID-19 atu determina, karik seidauk halo, sosa material no ekipamentu nesesáriu ba protesaun PNTL nian, kria fatin ne'ebe dignu no facilidade sanitárias ba PNTL ne'ebe halao segurança iha kuarantena no fatin izolamentu, no mós karreta no rádiu ka seluk atu garante komunikasaun efektivu.

PDHJ rekoñese kapasidade membru PNTL no F-FDTL atu promove solusaun pasífika ba konflitu no motiva kumprimentu ba regra sira sei depende ba kapasidade husi membru sira atu konsidera situasaun ne'ebé lori estrese boot ba sira-nia moris no serbisu. Ho nune'e, PDHJ rekomenda atu Ministério do Interior hamutuk ho lideransa husi PNTL no F-FDTL asegura katak membru husi forsa seguransa ne'ebé atua diretamente iha situasaun COVID-19 sei iha asesu ba apoiu moral ho psikososiál ho qualidade atu garante membru sira-nia kapasidade nafatin atu aplika regra sira ho kalma no ho objetivu edukativu iha situasaun emergjênsia hanesan Timor-Leste hasoru agora dadaun.

PDHJ nota husi nia monitorizasaun sira katak òrgãos no Serviços Administração Pública responsáveis ba aplikasaun medidas Estado Emerjênsia sira menus equipamentos hodi prevene sira nia-an husi Moras Covid-19. Wainhira laiha equipamento protesaun báziku hanesan máskara no luvas, fasil tebes atu pessoal sira ne'ebé iha linha frente bele hetan hadaet husi moras ida ne'e. Tan ne'e, PDHJ rekomenda ba Governo tenke garante pessoal husi òrgãos no Serviços Administração Pública responsáveis ba aplikasaun medidas sira hanesan F-FDTL, Bombeiros, segurança civil, Eletricidade de Timor-Leste (EDTL), servisu água no saneamento, servisu limpeza no pessoal sira ne'ebé hala'o servisu essencial tenke iha ekipamentu protesaun sira hodi prevene contágio husi vírus SARS-Cov2.

c. Facilidade ba Komunidade atu halo prevenasaun no combate Covid-19

Iha monitorizasaun PDHJ nian, comunidade barak mak expressa katak sira laiha kapasidade atu sosa no acesso ba máskara. Alem de ida ne'e, tamba difikuldade acesso ba bé, comunidade barak mak la halo tuir rekomendasaun husi Governo no Organizasaun Mundia Saude hodi fase liman bebeik. Tan ne'e, konsidera kapasidade financeira sidadaun sira nian iha tempo Estado Emerjênsia, PDHJ rekomenda ba Governo atu fornece máskara protesaun nomos *matérias sira hanesan hand sanitazer/alcól* ba sidadaun sira liliu sira ne'ebe kbi'it laek hodi garante kumprimentu ba regras sira Estado Emerjênsia nian.

PDHJ mos nota durante monitorizasaun katak vendedores ambulantes sira, inklui komersiantes sira iha merkadu ladun kumpri regras Estado Emerjênsia sira hanesan utiliza maskára nomos regra distansiamentu sosial. Iha estabelesimentu komersial balun la fornese bé no sabaun iha entrada ba facilidades sira, inklui kumprimentu regras Estado Emerjênsia nian iha lojas laran sira. Tan ne'e, PDHJ rekomenda ba entidades fiscalizadores medidas Estado Emerjênsia sira hodi continuamente aviza ba vendedores ambulantes, nain ba estabelesimentu komersial sira hodi garante katak ema hotu ne'ebé tama ba Estabelesimentu Komersial sira tenke kumpri regras Estado Emerjênsia nian. Sira ne'ebé la kumpri labele autoriza hodi tama.

PDHJ apresia ba esforsu Governo ho parceiros desenvolvimento sira ne'ebé hala'o esforsu lubun bot ida hodi garante katak iha via pública sira existe bé no sabaun ba comunidade sira hodi fase liman. **Tan ne'e, PDHJ rekomenda ba Governo atu kontinua esforsu di'ak ida ne'e liu husi fasilita fornecimentu bé mos no sabaun iha via públicas nomos merkadu hodi fasilita comunidade sira kumpri regra no conselho Governo nian hodi moris higiene.**

Iha okaziaun balun, PDHJ nota durante nia monitorizasaun katak existe ema halibur hamutuk iha fatin públiku sira hodi halao serimonia hasae bandeira, realiza evento kultural no seluk tan. Evetus hirak ne'ebé promove husi entidades públicas hirak ne'e laos deit hatudu inkumprimentu ba regras Estdu Emerjênsia nian, maibe mos promove aceleração propagasaun moras Covid-19 iha comunidade nia let. **Tan ne'e, PDHJ rekomenda ba Governo central atu informa ba administrações municipais nomos lideranças comunitárias sira atu bandu realizaun kualker eventos sociais no culturais sira ne'ebé implika halibur ema liu nain lima iha forma reuniaun ou manifestasaun.**

PDHJ apresia medida esforsu Governo nian hodi evita propagasaun moras Covid-19 liu husi bandu operasaun transportes públicos passageiros sira. Entretanto, PDHJ nota ho momos katak komunidade sira iha território tomak hetan difikuldade hodi halo movimentu hodi hetan tratamentu saúde, nomos atividades buka moris nian. **Tan ne'e, PDHJ rekomenda ba Governo atu fodi medidas sira ne'ebé bele fasilita sidadaun sira hodi halo sirkulasaun ba atividades essenciais sira.**

2. Identifikasaun no Tratamentu COVID-19

PDHJ rekoñese esforsu hosi Governu atu buka estabelese medida saúde ne'ebé nesesáriu atu bele combate moras COVID-19, inklui dezenvolve kapasidade atu halo teste ba moras refere no mós atu iha facilidade saúde nato'on atu fó assisténsia médika ba paciente sira no tempu hanesan izola sira atu la hada'et ba comunidade. PDHJ mós observa iha monitorizasaun katak, ho graduál, facilidade saúde iha nível Munisípiu dezenvolve ona kapasidade atu identifika no tais kazu suspeitu COVID-19.

Relasiona ho moras COVID-19, kapasidade atu identifika suspeitu, halo teste no izola paciente mak xave atu kontrola moras nia da'et. Ho nune'e, **PDHJ rekomenda atu asaun hot-hotu ne'ebé Governu fodi sei promove mekanizmu lalais atu identifika no izola suspeitu no rekomenda mós katak hari'i kapasidade assisténsia médika ba kazu COVID-19 tenke konsidera impaktu espesífiku ba sira-ne'ebé idade boot ona no ba sira ne'ebé iha kondisaun saúde ne'ebé lori perigu, inklui defisiénsia balun.**

3. Garantia ba Ema nia Privacidade

Direitu ba privacidade garantidu iha KRDTL, nu'udar direitu ida ho relevánsia boot bainhira Governu konsidera kestaun tratamentu ba moras saida de'it, liuliu moras hada'et nian. Iha kualkér tempu, asaun ne'ebé autoridade competente halo, tenke respeito nafatin ema nia direitu ba privacidade.

Identifikasaun no tratamentu ba moras COVID-19 representa dezafiu boot atu garantia ema-nia direitu privacidade, liuliu tanba iha espetativa hosi setór oi-oin sosiedade nian atu autoridade fó-sai ema moras COVID-19 nia informasaun atu bele fó-dalan ba ema privadu bele identifika karik nia iha risku nia laran ka la'e. Iha sosiedade Timor-Leste ne'ebé ho populasaun ki'ik no

ho estrutura ida ne'ebé bazeia ba ligasaun família nian ne'ebé boot, manutensaun privasidade dadu pesoál nian hanesan dezafiu boot ba autoridade pública.

Informasaun ba ema nia moris privadu, inklui ninia kondisaun relaciona ho moras COVID-19, bele fó-sai de'it ba públiku ho autorizasaun ema nian. Autorizasaun atu fó-sai informasaun ne'e tenke bazeia ba konsentimentu voluntáriu nian, no autoridade pública labele halo presaun ka intimidasaun atu promove ema-nia konsentimentu.

PDHJ simu informasaun husi sidadaun sira iha fatin konfinamentu obrigatóriu balun, hanesan otél Novo Horizonte, katak autoridade competente viola sira-nia privasidade tanba fó-sai sira-nia imajen la hó konsentimentu ka autorizasaun husi sira.

PDHJ rekomenda ba Governu atu garante katak informasaun kona-ba sidadaun nia identidade iha konfinamentu obrigatóriu bele fó-sai de'it bainhira iha autorizasaun ka konsentimentu husi sidadaun refere. PDHJ mós rekomenda atu hametin regra sira atu kumpre ho devér pesoál saúde nian relaciona ba privasidade paciente sira. Governu, liuhosi Ministério da Saúde, iha devér atu hametin liután kapasidade atu buka-tuir kontaktu pesoál hosi paciente COVID-19 hanesan meu ida atu mantein nafatin privasidade husi paciente pozitivu ho COVID-19.

PDHJ mós observa katak prátika atuál ne'ebé representante média hetan asesu ba informasaun liuhusi partisipasaun iha ekipa serbisu lidera hosi autoridade pública, ne'ebé inklui mós asesu ba fatin kuarentena no fatin seluk. Asesu ida-ne'e bele rezulta dúvida katak representante média rasik la iha nesesidade atu buka-hetan konsentimentu hosi ema privadu haree ba ema privadu nia dadus pesoál no ninia kondisaun iha kuarentena.

PDHJ rekomenda ba Secretario de Estado para a Comunicação Social atu promove koñesimentu hosi responsável média ba fatin kuarentena sira konaba prinsípiu autorizasaun ka konsentimentu husi ema privadu nian atu hetan filmajen no fó-sai informasaun kona-ba ninia situasaun saúde nian sei depende ba autorizasaun ida-idak nian.

4. Diskriminasaun no Stigma hasoru suspeitu no paciente COVID-19

Prinsípiu igualdade hanesan prinsípiu baze ba Estado democrátiku Timor-Leste nian. Autoridade pública tenke halo esforsu atu garante asaun no omisaun husi autoridade sei la diskrimina diretu no indiretu ema sira, no mós katak Estado mós sei foti medida pozitivu atu hamate sentimentu diskriminatóriu hasoru ema sira bazeia ba razasaun saida de'it, inklui sira-nia kondisaun saúde.

Esperiénsia ba tempu badak ho surtu COVID-19 hatudu katak populasan nia pániku mós reflète hatudu sentimentu ida-ne'ebé diskriminatóriu hasoru suspeitu no paciente moras COVID-19 nian. PDHJ observa rasik katak espresaun stigma akompaña ho mensajen sira-ne'ebé hatudu husi parte balun normalizasaun ba violénsia.

PDHJ haree katak membru populasan balun sente livre atu espresa a'an sentimentu diskriminatóriu no stigma ne'ebé mós promove uza violénsia nu'udar meu poténsial atu hatán ba preokupasaun bazeia ba diskriminasaun ne'e. **PDHJ rekomenda ba entidade pública hot-hotu tenke halo esforsu ida atu foti asaun hodi hatudu katak violénsia no diskriminasaun la'ós hanesan valór ne'ebé sosiedade Timor-Leste simu.**

5. Asesu ba Informasaun

Moras COVID-19 hanesan moras ida-ne'ebé bele lori ta'uk no pániku ba comunidade haree ba ninia natureza da'et rasik no mós haree ba ezisténsia ba informasaun falsa ne'ebé sirkula iha comunidade nia leet no iha mídia sosiál.

Iha situasaun Estadu Emerjénsia, Estadu nia dever atu promove transparénsia informasaun hot-hotu ho loloos ba públiku ligadu ho combate surtu pandemia COVID-19. Informasaun loloos no natoon kona-ba COVID-19 sei ajuda atu hasees sidadadun sira nia sentimentu tauk no pániku ba pandemia ne'e no kontribui konsiensializa sidadaun hotu-hotu atu hola-parte hodi apoiu esforsu Estadu iha combate hasoru moras refere.

Asesu ba informasaun hanesan garantia ida rekoñesidu iha Konstituisaun no tratadu internasionál. Relasiona ho prevensaun no combate COVID-19, Estadu iha devér atu garante fahe informasaun kona-ba estratéjia no medida ne'ebé foti ba prevensaun no tempu hanesan iha devér atu haforsa ema-nia kapasidade atu sira rasik bele proteje a'an. Medida preventiva pesoál hanesan fase liman no mantéin distansiamentu fíziku nu'udar medida ne'ebé esensiál atu prevene moras hada'et ba ema seluk.

Garante comunidade hetan informasaun ho regulár no espesífiku importante atu asegura direitu ema nian, no mós atu promove kumprimentu ba medida preventiva sira. **PDHJ rekoñese esforsu hosi Governu, ho envolvimentu husi mídia no jornalista sira, liuhusi atualizasaun regulár ba situasaun COVID-19 no fahe informasaun kona-ba situasaun liuhusi meu oi-oin.**

PDHJ apresia esforsu atu promove fahe koñesimentu ba mekanizmu prevensaun pesoál, tuir PDHJ nia observasaun, hetan duni impaktu pozitivu no ho lalais comunidade barak iha nível lokál hetan ona koñesimentu xáve ba medida prevensaun pesoál. Sosializasaun halo liuhusi implementasaun asaun informativu iha nível nasional – liuhusi mídia, televizaun, SMS – no mós iha nível lokál – liuhusi mensajen iha rádiu komunitáriu no iha comunidade no fahe informasaun iha fatin-xáve sira ne'ebé populasan lokál hetan asesu. PDHJ mós nota katak esforsu sosializasaun ba informasaun hala'o ho maneira koordinada no hamutuk parseiru dezvoltamentu sira no mós organizasaun naun governamental no grupu komunitáriu sira.

Durante monitorizasaun, fiskalizadores PDHJ sira nota katak comunidades sira iha área rural ladun kumpri regras Estadu Emerjénsia hanesan distansiamentu sosial, nomos uza máskara wainhira halao atividades komersial sira iha merkadu, ba halo tratamentu dokumentus iha sede suco nomos lao iha via pública sira. Kumprimentu ba regras Estadu Emerjénsia nian importante tebes hodi prevene propagasaun moras Covid-19 iha Timor-Leste. **Tan ne'e, PDHJ rekomenda ba Governo atu intensifika sosializasaun no sensibilizasaun medida preventiva COVID-19 ba comunidade sira iha área urbana no rural hodi garante kumprimentu regra sira Estadu Emerjénsia, inklui mobiliza lider komunitáriu atu sai agente iha báze atu garante alkanse ema hotu ba informasaun sira-ne'e no hametin kapasidade fiskalizasaun implementasaun regra, inklui ba fatin komersiál sira husi entidade pública relevante.**

Asesu ba informasaun hanesan direitu ema hotu nian, maibé realidade hatudu katak dala barak ema ho defisiénsia iha dezafiu atu asesu informasaun ho kondisaun igualdade. PDHJ apresia ho envolvimentu profisionál lian jestuál iha mídia briefing loroloron halo hosi Centro Integrado de Gestão de Crises. PDHJ hatene katak organizasaun naun governamental ne'ebé apoiu direitu ema ho defisiénsia no PDHJ rasik rekomenda ona ba Governu atu promove asesu ba lian jestuál iha programa televizaun relevante. **PDHJ haksolok ho avansu ida-ne'e iha tempu importante hanesan Estado Emerjénsia, no espera katak sei kontinua nafatin esforsu refere ba futuro.**

PARTE III – ASUNTU SELUK RELEVANTE BA DIREITU NO GARANTIA EMANIAN NO IMPAKTU NEGATIVU HOSI ESTRATÉJIA PREVENSAUN NO KOMBATE BA COVID-19

1. Direitu ba Ai-Han, Moris Adekuadu no Direitu Traballu

Estadu iha devér atu garante polítika ne'ebé bele permite populasaun rasik buka meu atu hetan ninia ekonomia rasik, no fó apoiu ba comunidade ne'ebé vulnerável liu⁹.

Atu garante sidadaun sira nia direitu iniciativa ekonomia, regra Estado Emerjénsia permite atividade ekonomia funciona nafatin, maibé sujeitu ba kondisaun balun. Sidadaun hotu iha direitu asesu ba estabelesimentu komersiál sira ho kondisaun uza máskra, fase liman no mantein ditánsia fíziku ho ema seluk mínimu metru ida. Permite loja, kios, supermerkadu no merkadu sira operasiona hanesan bain-bain ho kondisaun negosiante hirak refere tenke kria mós kondisaun hanesan prepara bé ho sabaun sira iha dalan tama ba estabelesimentu komersiál.

Mesmu nune'e, mosu implikasaun negativu mós ba sidadaun sira nia rendimentu ne'ebé ki'ik liu kompara ho tempu molok Estado Emerjénsia no kapasidade sosa hosi família sira tu'un haree ba folin sa'e iha situasaun balun.

PDHJ kongratula esforsu Governo nian hodi kontrola presu sasan merkadoria nian iha rai laran, liu-liu iha Dili laran. Entretanto, PDHJ observa katak iha RAEOA folin sasán nessesidade báziku sira sae, reserva sasan merkadoria iha loza sira limitadu tamba limitasaun frekuénsia transportasaun merkadoria hosi kapitál Dili ba RAEOA. **Tan ne'e PDHJ rekomenda ba Governo liu husi AIFAESA atu kordena ho Presidente Autoridade no Administrador Munisípiu sira hodi continua fiscaliza presu hahan básico iha estabelecimento comercial sira, inklui mercado sira, hodi garante estabilizasaun preço, laos deit konsentra iha Dili maibe iha Munisípiu ho RAEOA.**

Iha kapital Dili, loja sira balun loke no balun mós taka, motorista mikroleta no taxista sira tenke lakon rendimentu nune'e laiha kapasidade atu responde nesesidade moris família nian. Empreza sira hahú hapara traballadór sira tamba lakon rendimentu nune'e laiha kapasidade atu fó saláriu ba sira-nia traballadór.

Haree ba realidade ne'e, PDHJ iha preokupasaun boot ho impaktu negativu ba direitu moris adekuadu no nutrisaun bainhira continua limita populasaun nia movimentu nu'udar meu nesesáriu ba prevensaun hada'et COVID-19. Preokupasaun boot liu mak relasiona ho populasaun ne'ebé vulnerável, liuliu sira-ne'ebé hala'o atividade to'os, informál no sira-ne'ebé iha negósiu ki'ik hanesan meu sustenta moris família nian. PDHJ kongratula Governu nia desizaun atu implementa medida apoiu finanseiru ba uma ka'in, maibé nota katak ho limitasaun ba transporte públiku no ho difikuldade atu sosa aihán sei la garante katak apoiu finanseiru ne'e sei reflete garantia nutrisaun no hahan ba ferik no katuas sira, ema ne'ebé inkapasidade liuliu ba labarik sira.

PDHJ rekomenda atu Governu implementa ho lalais medida apoiu finanseiru ba uma ka'in sira no mós atu konsidera distribuisaun sasán báziku nian ba família vulnerável, inklui sira ne'ebé hela iha área remotas.

⁹ Comité dos Direitos Económicos, Sociais e Culturais, Comentário Geral n.º 12: Artigo 11.º (O Direito a uma Alimentação Adequada), Vigésima sessão, 1999, para. 6 ba leten.

2. Asesu ba Edukasaun

Asesu edukasaun hanesan garantia ida importante iha kualkér tempu. Importante atu determina Polítika Edukasaun Inkluziva hodi garante asesu hanesan ba estudante sira hotu. La iha dúvida katak iha rai Timor-Leste, ho limite ba asesu meu komunikasaun no *internet* haree ba kondisaun ekonómika comunidade nian, sei iha dezafiu atu garante implementasaun ensinu à distánsia.

PDHJ rekoñese esforsu hosi Governu atu lalais estabelese ensinu à distánsia liuhosi programasaun televizaun no fahe materiál ensinu liuhosi meu oiniuin. PDHJ rekoñese difikuldade família sira atu kontribui ba prosesu aprendizajen no apresia ho deklarasaun Governu liu husi Ministra katak MEJD sei elabora planu ba atividade rekupersaun.

Iha tempu hanesan, PDHJ mós fahe preokupasaun ne'ebé populasau balun hato'o kona-ba difikuldade asesu ba materiál iha área rurál no husu Ministério da Educação, Juventude e Desporto atu aselera distribuisaun materiál sira ba área rurál atu promove asesu ho kondisaun igualdade ba labarik hotuhotu. **PDHJ mós rekomenda atu Governu bele konsidera distribuisaun materiál hamutuk distribuisaun ai-hán ka apoiu umanitáriu seluk.**

3. Direitu ba Asisténsia Médika iha ámbitu jerál

Iha kualkér tempu, mezmú durante Estadu Emerjénsia, direitu ba asesu asisténsia médika tenke realiza nafatin¹⁰. Nesesidade hosi populasau atu hetan nafatin asisténsia médika la hatún ka la hamenus iha tempu prevensaun no combate COVID-19. Inan-feto sira isin-rua presiza konsulta, ema ho HIV/AIDS no tuberculosis sei presiza nafatin kontinua tratamentu regulár ba ai-moruk relevante.

PDHJ observa katak iha nível lokál, hanesan nível Postu Administrativu no Suku, klínika saúde sei nafatin halo atendimentu ho bainbain, hanesan iha Baucau iha postu saúde Buruma no mós iha postu saúde Ritabou iha Maliana.

PDHJ observa katak Sentru Saude ho Postu Saude sira hala'o nafatin funsaun hodi fó atendimentu ba comunidade sira maibe prezensa pasiente mak menus tebes tanba movimentu transportes publikus laiha no sira rasik mak lá-ba konsulta ka halo tratamento saúde iha facilidade saude sira.

Estratéjia COVID-19 hahú implementa iha facilidade saúde iha teritóriu tomak bazeia ba prosesu triajen nian, ho intensaun atu identifika potenciál pasiente COVID-19 atu promove isolamentu, maibé iha tempu hanesan **triajen**, esensiál atu garante katak facilidade saúde sei kontinua fó asisténsia ba moras no kondisaun sira seluk¹¹.

Avansu barak Timor-Leste hetan tiha ona iha área saúde, hanesan mós reflète iha indikadór sira saúde nian¹², ho espesiál saúde feto isin-rua nian no saúde infantil. PDHJ konsidera katak importante katak durante esforsu prevene no combate COVID-19 progresu sei kontinua nafatin no sei la lori impaktu negativu ba avansu sira-ne'e.

¹⁰ artigu 57, nú. 1 KRDTL.

¹¹ UN POLICY BRIEF: The Impact of COVID-19 On Women, 9 April 2020, p. 12

¹² 4th Periodic State Party Report on the Convention on the Elimination of All Forms of Discrimination Against Women (CEDAW), November 2019, para. 170 no Report on the Implementation of the Sustainable Development Goals, Voluntary National Review of Timor-Leste 2019, p. 55 – 59.

Ho nune'e, PDHJ rekomenda ba Ministério da Saúde no parseiru sira, ho apoiu hosi autoridade lokál, atu garante katak comunidade sei iha nafatin oportunidade atu buka asisténsia médika nesesáriu, la relasiona ho COVID-19.

4. Moris la hó violénsia, inklui violénsia doméstika

Seguransa importante tebes ba moris nasaun-nian hodi garante ema hotuhotu iha respeitu ba integridade física nu'udar direitu fundamentál rekoñesidu. Instituisaun seguransa, liu-liu Polísia Nasionál Timor-Leste (PNTL) mak iha kompeténsia tomak atu garante órden, seguransa no trankilidade públika hanesan hatu'ur ona iha Lei Orgánika PNTL nian no enkuadramentu jurídku ba seguransa nasional¹³.

Medida Estadu Emerjénsia hatuur katak serbisu seguransa labele iha kualkér interupsaun ida¹⁴. Garantia ne'e tenke inklui continuidade ba asesu serbisu seguransa inklui kompeténsia atu rejistu denúnsia ka kesar krime¹⁵.

Polísia labele uza Estadu Emerjénsia nu'udar razaun atu la rejistu krime ne'ebé akontese, hanesan PDHJ observa akontese iha Suku Suai Loro, Postu Administrativu Suai Vila, no iha Aldeia Uatu-Rau, Suku Gariwai, Postu Administrativu Baucau, Munisipiu Baucau.

PDHJ rekomenda ba Komandu Jeral PNTL atu orienta polísia sira, iha nível Esquadra no iha nível Oficial Polísia Suku, atu kontinua nafatin fó atendimentu ba públiku. Polísia nu'udar odomatan dahuluk atu vítima krime saída de'it hetan asesu ba justisa, hanesan direitu umanu esensiál ba protesaun garantia direitu sira seluk.

PDHJ simu kesar 8 ne'ebé relasiona ho uza forsa esesivu hosi membro PNTL la relasiona ho medida prevensaun COVID-19 durante Estadu Emerjénsia. Numeru ne'e hatudu katak komportamentu husi membro PNTL balun laos reprezenta atitude no atuasaun husi membro PNTL hotu ne'ebe halo servisu ho dedikasaun no profesionalismu.

No entanto kesar ne'ebe PDHJ simu konsidera hanesan violasaun grave ba direitu sidadaun sira nian:

1. Iha loron-30 fulan-Marsu tinan-2020, sidadaun ida ho moras mentál ne'ebé suspeitu komete krimi tentativa oho hetan atuasaun ho forsa esesivu no agresivu hosi Membrus Unidade Polícia Marítima. Asaun ne'ebé membrus sira halo mak hanesan rega gas air mata ba sidadaun ne'e, aperta sidadaun ne'e nia kakorok no tebe nia ho sira nia botas.
2. Iha loron 01 fulan-Abril tinan-2020, membru PNTL husi Esquadra Becora halo agresaun fizika hasoru joven 1 uza fiu-eletriku no ai-sanak hodi baku joven ne'ebé tur iha estrada-ninin iha area Becora.
3. Iha loron 02 fulan-Abril tinan-2020, membru PNTL liuhosi Unidade *Task Force* halo agresaun fizika ba joven sira iha Bairro Boraxaralan, Suku Lahomea, Postu Administrativu Maliana ne'ebé balun hetan kapturasaun no seluk subar iha comunidade nian le'et.

¹³ Artigu 2 Dekretu-Lei nú. 9/2009, hosi 18 Feveireiru no Artigu 9 Dekretu-Lei nú. 2/2010, hosi 21 Abril.

¹⁴ Artigu 26 Dekretu Góvernú nú. 3/2020, hosi 27 Marsu.

¹⁵ UN POLICY BRIEF: COVID-19 and Human Rights: We are all in this Together, 23 April 2020, p. 15

4. Iha loron 3 abril tinan 2020, Membro PNTL halo agresaun fizika ba sidadaun ida iha nia uma iha Suku Gariwai, Aldeia Waturau.
5. Iha loron 9 fulan abril tinan 2020, membro PNTL halo agresaun fizika ba sidadaun ida ne'ebe halao hela kuarantena iha hotel Vila Verde, Dili.
6. Iha loron-14, fulan-Abril, tinan 2020 iha Suku Suai Loro, membru PNTL husi Unidade *Task Force* estraga sasan iha kios refere no halo agresaun fizika ba kios nain.
7. Iha loron-17, fulan-Abril tinan-2020, iha area Dili, wainhira membro Polisia Tranzito halo passa revista ba sidadaun balun ne'ebé mak nia motorizada laiha numeru matrikula no haluhan karta kondusaun, membro Polisia tranzito la-halo atuasaun tuir regras transito nian, maibe membro Polisia tranzito ne'e uza forsa hodi baku no tebe sidadaun sira ne'ebé mak viola regra transito.
8. Iha loron 20 abril tinan 2020, Membro PNTL baku jovem sira ne'ebe halibur malu hela iha uma laran iha Bairro Perekiki Suku Fuiloro, Postu Administrativu Lospalos, Munisipiu Lautem.

Hanesan rekomenda ona relasiona ho atuasaun PNTL nian ba medida prevensaun COVID-19, PDHJ rekomenda atu Komandu Polisia, no mós Centro Integrado de Gestão de Crises, atu kontinua garante kumprimentu regorozu ba padraun uza forsa husi polisia, no kontinua lori responsabilizasaun ba membru sira ne'ebé viola padraun báziku nian.

Relasiona ho violénsia doméstika, mezmuké Timor-Leste seidauk iha asesu ba dadus ne'ebé hatudu katak violénsia doméstika sa'e durante tempu Estado Emerjénsia, haree ba prevalénsia a'as violénsia doméstika iha Timor-Leste no rejistu aumentu violénsia doméstika iha rai sira seluk¹⁶ bainhira implementa medida restrisaun direitu movimentu, **PDHJ rekomenda atu Timor-Leste foti medida proativu atu nafatin garante kontinuidade ba serbisu protesaun ba feto sira, inklui atendimentu iha eskuadra polisia no iha Unidade Ema Vulnerável (VPU).**

PDHJ mós rekomenda atu determina katak servisu sosiál hanesan uma mahon ba feto no labarik vítima violénsia doméstika tenke identifika hanesan servisu públiku esensial¹⁷ durante Estado Emerjénsia. Aleinde-ne'e, Governu tenke garante fundu COVID-19 sei inklui apoiu espesífiku ba uma mahon sira atu fó-dalan ba sira kontinua fó prestasaun di'ak iha tempu.

PDHJ liuhosi rezultadu monitorizasaun observa katak uma mahon ida iha RAEOA la iha kapasidade atu simu vítima foun. Uma mahon balun ne'ebé parseiru hosi Governu atu promove implementasaun devér Estado nian tuir Lei kontra Violénsia Doméstika¹⁸, la iha preparasaun ho másimu atu garante kontinuidade serbisu no kontinua fó protesaun ba vítima sira, liuliu labarik.

¹⁶ UN POLICY BRIEF: The Impact of COVID-19 On Women, 9 April 2020, p. 17

¹⁷ *Ibid*, p. 17

¹⁸ Artigu 15, Lei kontra Violénsia Doméstika Lei nú 7/2010

PDHJ apresia ho aprovasaun ba giaun ida hosi MSSI haree ba kestaun moras COVID-19 iha uma mahon no mós establishesimentu uma tranzitóriu foun atu bele ajuda implementasaun izolamentu ba vítima foun ne'ebé atu tama iha uma mahon durante tempu COVID-19. Importante duni atu entidade públika foti medida atu proteje feto-vítima krime no tempu hanesan hatún risku hada'et hosi COVID-19 iha instituisaun rezidensiál hanesan uma mahon.

5. Atendimentu públiku

Servisu atendimentu públiku durante Estadu Emerjénsia tenke kontinua funsiona nafatin atu garante implementasaun tuir Dekretu Governu nú. 3/2020, hosi 28 Marsu. Servisu públiku sira hotu presiza, tuir artigu 25, kontinua fó atendimentu públiku, mezmuké ho limitasaun haree ba nesesidade atu funsionáriu no ajente sira atu respeito regra limitasaun ba movimentu sira iha tempu Estadu Emerjénsia.

PDHJ observa katak iha Região Administrativa Especial Oecusse Ambeno (RAEOA) servisu atendimentu públiku sira kontinua garante prestasaun servisu mínimu. Diresaun Regional Patrimóniu Estadu RAEOA organiza funsionáriu sira kontinua presta servisu durante Estadu Emerjénsia ho forma turnu hodi halo atendimentu logístiku ba servisu hotu iha RAEOA hanesan fó atendimentu ba Secretariadu Regional Assuntu Saúde hodi trata assuntu COVID-19; distribui kombustivel no halo kontratu ba kompañia balun hodi halo manutensaun ba patrimóniu Estadu nian sira ne'ebé presija manutensaun urjente.

PDHJ mós observa katak BNCTL iha munisípiu Dili no Manufahi kontinua fó atendimentu públiku durante oras lima kada loron efetivu servisu.

PDHJ observa katak servisu públiku hanesan EDTL ho bé no saniamentu kontinua nafatin fó atendimentu ba populasan. Servisu hanesan notáriu mós funsiona nafatin.

PDHJ rekoñese esforsu Komisaun Funsan Públika atua lalais atu aprova Orientasaun espesífiku atu apoiu kontinuidade funsionamentu administrasaun públika, no Dekretu Governu medida sira Estadu Emerjénsia identifika mós konsekuénsia dixiplinár¹⁹.

PDHJ rekomenda katak prestasaun servisu públiku tenke kontinua nafatin, haktuir dekretu Governu, no presiza cumpre regras segurança no saúde nian.

Durante monitorizasaun, PDHJ nota katak lideres komunitarias sira halibur hamutuk komidade barak iha sede sucos nomos sede aldeias hodi promove tratamento documentos ficha famílias hodi hetan subsidio husi Governo hanesan iha Suku Letefoho, Munisípiu Manufahi, Suku Lahomea no Suku Karabau, Munisípiu Bobonaro. Medida ida ne'e diak hodi garante sidadaun sira bele apoio subsidio husi Governo, maibe iha tempo hanesan mos fo risku ba komidade sira hodi hetan hadaet husi moras Covid-19. **Tan PDHJ rekomenda ba Governo atu orienta ba lider komunitarias sira (Chefe Suco no Chefe Aldeia) atu labele halo atividade ne'ebé halibur ema liu nain liman hanesan halo tratamento ficha família uma kain sira no seluk tan. Lider komunitarias sira presisa promove medidas sira ne'ebé hadok ema husi propagasaun moras Covid-19 liu husi visita ba sidadaun sira nia ema, en vez de, sidadaun sira mak ba iha sede suco.**

¹⁹ Artigu 25, nú. 4 Dekretu Governu nú. 3/2020, hosi 27 Marsu.

Durante monitorizasaun, PDHJ rejista reklamasaun husi comunidade sira konaba Chefe Suco no Chefe Aldeia balun iha Munisipiu Manufahi, Bobonaro no RAEOA ne'ebe halo kobraisa ilegal ba comunidade sira ne'ebe atu trata ficha familia hodi simu subsidu husi Governu.

PDHJ rekomenda ba Governo liu husi Ministro Administrasaun Estatal atu fo orientasaun eskrita ba autoridade local sira atu la bele halo kobraisa ilegal ba iha comunidade sira ne'ebe atu trata ficha familia.

PDHJ rekomenda atu Governu tenke konsidera mekanizmu hafahe apoiu finanseiru no apoiu seluk ho estudu kle'an molok determina politika sira-ne'ebe sei estimula comunidade hatuur aan iha risku hafasil propagasaun surtu COVID-19.

PDHJ congratula Governo ba aprovasaun medidas social no economico sira hodi hatan ba impaktu negativu husi Estadu Emerjensia nian ne'ebe sei hetan financiamento husi Fundo Covid-19. Tamba medidas hirak ne'e hatur ona iha enkuadramento legal sira, **PDHJ rekomenda ba Governo atu garante katak jestaun orsamentu Fundo Covid-19 nian halo tuir deit regras sira ne'ebe iha. Precisa promove transparansia iha exekusaun orçamento ida ne'e hodi nune bele hasae konfiansa publiku nian ba órgão administrasaun pública sira iha tempo defisit ida ne'e.**

PDHJ nia pozisaun katak tenke iha ezersisiu kolektivu hosi entidade hotu-hotu hodi garante katak servisu publiku iha kapasidade atu respeitu regra sira distansiamentu fiziku no ijiene liman no tempu hanesan konsiensializa comunidade liu-liu iha nivel suku.

Dili, 30 de abril de 2020



Jesuina Maria Ferreira Gomes, MPA
Providora